

Mitm Zehn-Liter-Tippe unerwechs

So manches geht em dorch de Kopp, wann mer sich vorholt, mitm Zug in e Banater Dorf zu fahre. So is es mer doneilich gang, wie ich uf Bogarosch han fahre wille. Bis Hatzfeld kann mer mit dere CFR fahre, dorte muss mer iwersteije un sich in e Motorzug sitze, der wu privat is. Weil mer jo nit ins Ungewissi fahre kann, sin ich e Tach vorher an de Temeschwarer Bahnhof gang, for mich intressiere. Also Kart lese kann mer von do aus nor bis Hatzfeld. Dorte sitzt mer sich dann in de Motorzug un wann de Kartezwicker kummt, tut mer direkt bei dem sei Kart im Zug lese. Des han ich erfahr un ach, dass des Zug geeger Hatzfeld vun der Linie Reschitza ens abfhare tut.

Die ganzi Nacht han ich mich in dem Bett rum gewänzelt, weil ich mer de Kopp verbroch han, wie ich in dem Temeschwar insteij un in Bogarosch runerkumm. Weil aus Erfahrung han ich gewisst, dass beim Iwersteije in Hatzfeld ke Problem werd sin, weil dorte hochi Betonplatte geleet sin. Ich han dran gedenkt, e Plastik-Eemer mitzuholle un de umstilpe, dass ich nuf un nuner kumm. De Gedanke awer verworf, weil ich Ängschter ghat han, dass ich de Bodm intreet un mer noch e Fuss derbei brech. Un ufmol hats gfunkt bei mer: ich hol eenfach de Zehn-Liter-Tippe in eem große Zecker mit. Wie ich froh iwer mei Infall inschlofe han wille, hat de Wecker gerappelt. Ich han de Tippe ingepackt un sin je.

War gut, mei Infall. Weil ohne de Tippe wär ich nit in Temeschwar uf de Zug nuf kumm. Es hat mich gar nit gsteert, dass die Leit mich ausgelacht han. In Hatzfeld, wie gsaat, sin ich umgstie un wie mer gleich in Bogarosch ware, han ich mer schun e Mann ausgesucht, de wu ich bitte han wille, er soll vor mir aussteije, mer de Tippe une rumkippe un mer nuner helfe. Wie de Zug stehn geblieb is, han ich nor staune kenne: Großi Betonkletz ware ufgstellt, mer hat kummod in- un aussteije kenne. Es enzichi Problem war jetz, dass ich de ganze Tach mit dem Mordstippe un Zatschko in Bogarosch rumlaafe han misse.

Die dritti Hand anstatts de Tierestock

Mir alli wisse jo, wie des is, wann em de Buckl beisse tut. Mir versucht erschter mit der rechtsi, dann mit der linksi Hand, an des Platz ufm Buckl zu kumme. Dreht sich hin un her, derbei gspiirt mer, dass es Beisse immer stärker git un kummt nit an des Platz dran.

Wann eener im Haus is, geht mer de an, em de Buckl zu kratze. Doch wann kenner in der Näh is, versucht mers erscht mitm Kochlefflstiel – der helft a nit vill, er is zu kurz. Dann tut mer sich gar oft an de Tierestock anlehne mitm Buckl un fangt an ruf un nuner, rechts un links zu ripple un zu ritsche bis mer endlich soweit is, dass es Beisse ufheert. Was oft gar nit so einfach is, weil je meh mer rippelt, um so meh Plätzer, die beisse, vergspiirt mer un kennt aus der Haut fahre.

Doch die Technik schlaat Welle un es git heizutach immer e Auswech gfunn. So hat eener, natierlich weess ich nit sei Name, a an die Leit gedenkt, dene wu de Buckl beisse tut. Er hat gstudiert un e Erfindung gemacht. Sie nennt sich „die dritti Hand“! Derbei handelt es sich um e Art Plastikhand, e lange Stiel un am End Klopscher, grad so wie krummi Fingre. Erschtmols han ich des Ding vor kurzem in Deitschland gsiehn un erschter nit gewisst, was es is. Han mer erkläre gelosst, dass die Erfindung villi Leeit, dene wu de Buckl beisse tut, zur Hilf kummt. Mer muss nor mit dene Klopschre ufm Buckl hin un her fahre. De Stiel is lang genuch, dass mer alli Plätzer lescheer erraiche kann.